

四庫全書

史部

欽定四庫全書

史部

蜀中廣記卷

三十五至
四十

詳校官編修臣翟槐

編修臣程嘉謨覆勘

總校官庶吉士臣何思鈞

校對官學正臣陳木

謄錄舉人臣羅允文

欽定四庫全書

蜀中廣記卷三十五

明 曹學佺 撰

邊防記第五

上川南道

黎州

水經注曰江水自笮道與濛溪分至蜀郡臨邛縣與布
僕水合布僕自徼外成都西流黎郡來按沉黎即笮道

寰宇記云夷人於大水之上置藤為橋謂之笮也蜀
記周赧王三十年誅蜀侯綰置守蜀守張若因取笮及
其江南地史記笮都古西南夷自越雋以東北君長以
十數笮都最大秦時常為郡縣至漢興而罷自唐蒙使
畧通夜郎而叩笮之君請為內臣及漢誅且蘭叩君并
殺笮侯乃置笮都縣註漢書曰旄牛縣歲貢旄牛尾以
為節旄也元鼎六年以為沉黎郡至天漢四年并蜀為
兩部置兩都尉一居旄牛主徼外夷一居青衣主漢人

後漢永平中益州刺史梁國朱輔慷慨有大畧宣示漢
德威懷遠夷自汶山以西前代正朔所不加白狼槃木
唐叢等百餘國戶百三十餘萬口六百萬以上舉種奉
貢稱臣僕輔上疏曰臣聞詩云彼徂者岐有夷之行傳
曰岐道雖僻而人不遠詩人誦詠以為符驗今白狼王
唐叢等慕化歸義作詩三章路經邛來大山零高坂峭
危峻險百倍岐道經負老幼若歸慈母遠夷之語辭意
難正草木異種鳥獸殊類有犍為郡掾田恭與之習狎

頗曉其言臣輒令訊其風俗譯其辭語今遣從事史李陵與恭護送詣闕并上其樂詩昔在聖帝舞四夸之樂今之所上庶備其一帝嘉之事下史官錄其歌焉遠夸樂德歌詩曰大漢是治與天合意吏譯平端不從我來聞風向化所見奇異多賜繒布甘美酒食昌樂內飛屈申悉備蠻夸貧薄無所報嗣願主長壽子孫昌熾遠夸慕德歌詩曰蠻夸所處日入之部慕義向化歸日出主聖德深恩與人富厚冬多霜雪夏多和雨寒溫時適部

人多有涉危歷險不遠萬里去俗歸德心歸慈母遠夸
懷德歌曰荒服之外土地瘠塉食肉衣皮不見鹽穀吏
譯傳風大漢安樂攜負歸仁觸冒險峽高山岐峻緣崖
礧石木薄發家百宿到洛父子同賜懷抱匹帛傳告種
人長願臣僕肅宗初輔坐事免是時郡尉府舍皆有雕
飾畫山神海靈奇禽異獸以眩耀之夸人益畏憚焉和
帝永元十二年旄牛徼外白狼樓薄蠻夸王唐繒等遂
率種人十七萬口歸義內屬詔賜金印紫綬小豪錢帛

各有差安帝永初元年蜀郡三襄種夸與徼外汙衍種并兵三千餘人反叛攻蠶陵城殺長吏二年青衣道夸邑長令田與徼外三種夸二十一萬口賫黃金旄牛牂舉土內屬安帝增令田爵號為奉通邑君廷光二年春旄牛夸叛攻零闕殺長吏益州刺史張喬與西部都尉擊破之于是分置蜀郡屬國都尉領四縣如太守桓帝永壽二年蜀郡夸叛殺畧吏民延熹二年蜀郡三襄夸寇蠶陵殺長吏四年犍為屬國夸寇郡界益州刺史山

昱擊破之斬首千四百級餘皆解散靈帝時以蜀郡蜀國為漢嘉郡十六國春秋曰李雄有蜀置沉黎漢源二郡周地圖記天和初破羌夸得此土因立黎州及沉黎縣矣寰宇記云隋開皇改黎州為登州煬帝初廢州併其地入臨邛郡唐置南登州大足元年割漢源飛越二縣及雋州之陽山縣置黎州神龍三年廢開元三年又置天寶元年改為洪源郡乾元元年復為黎州領羈縻五十五州僖宗又置永平軍宋復為黎州繼陞平陽

軍節度領漢源通望二縣治在漢源通志云元屬吐蕃等處宣慰司國初洪武八年省漢源縣改為黎州長官司十一年陞安撫司并置大渡河守禦千戶所隸四川都司屬上川南道 元和志曰黎州之地闕沫若而徼牂柯處越嶲邛蜀之中樊柔直侯寶堂記云全蜀五十餘州沉黎為襟喉地以南隣六詔而西接吐蕃也 後漢書犛都夸其人披髮左衽言語多好譬類居處畧與汶山夸同土出長年神藥仙人山圖所居也蜀郡記曰

諸山夸獠子娘七月生生時必臨水兒出便投水中浮
則取養沉乃棄之按沉黎之名或取此而樂子正以為
黑水所經矣宋史黎州諸俗尚鬼以主祭者為鬼主其
酋長號曰都鬼主 宋郡守余授朱纓堂記蠻商越駟
羶裘椎髻交錯于闐闐中寰宇記蕃部蠻夸混雜之地
元無市肆每漢人與蕃人博易不使見錢漢用綢絹茶
布蕃部用紅椒鹽馬之類 志云國初安撫副使馬芍
德築沉黎城今司治也沉黎驛在其北二里而漢唐宋

之黎州則理在漢源縣今廢為鎮去司南二十五里
寰宇記云漢源縣漢沉黎縣地宋立郡于此隋仁壽四
年置縣以大川之源為名長安四年巡察使殷祚奏置
黎州後刺史宋乾微奏廢入雅州開元三年又置黎州
以縣來屬按此即舊黎州也方輿勝覽云黎城中有
漢越嶲太守任貴蜀漢姜維趙雲馬忠諸祠又有玉淵
書院宋開禧初知縣薛紱建志云廢漢源縣東有唐三
王墓唐史邛黎間有三蠻王使伺南詔卒葬于此蓋恭

化王劉志遠和義王郝全信遂寧王楊清遠也北夢瑣
言邛黎之間有淺蠻焉世襲王號曰劉王楊王郝王歲
支西川衣賜三千金俾偵雲南動靜雲南亦資其覘成
都盈虛恒持兩端而求利焉遇元戎下車即率界上酋
長詣府庭號曰叅元戎不察自謂威惠所致其來叅必
潛稟于都押衙以候可否或元戎慰撫稍至乖方即教
其紛紜于時帥臣多文儒不欲生事都押衙席其利亦
要姑息故蠻夸得以憑凌無忌王建始鎮蜀絕其舊賜

斬都押衙山行章以徇邛峽之南不立一堠不戍一卒
十年不敢犯境末年命大將許存征徼外蠻為三王洩
漏軍機于是召而斬之時號英斷邊患屹然矣 勝覽
云州治靜鎮堂弘敞邃深為郡之冠冕左右有藏春留
香二亭及思仙臺圖經云昔人有駕牛採樵入蒙秦山
見二老人奕棋其人繫牛坐斧而觀局未終老人謂曰
非汝久留之所樵者起而斧柯已爛牛已枯矣詩云思
仙亭上望蒙秦此間昔有避秦人不應棋罷却歸去再

見桃花且問津 勝覽云郡圃東湖方廣十丈架橋其
中芙蓉萬蓋錦鱗千尾橋上有喚魚亭又云州宅之白
雲泉從白塔谷前取水穴城東以入始以槽承之分於
四大井焉藜廳在小廳東隅世傳唐三藏師遊西域經
行值藜杖于地曰他日州治在此果如師言杖成株高
五十尺圍九尺天聖間回祿人取其枝以接他枝矣有
梵音水亦云三藏至此持梵音而水湧出故名水色如
米瀋而甘在今治南半舍 按玄奘西域記取經由涼州

出塞似未入蜀而三藏者乃僧之通稱也孫光憲瑣言云唐咸通中有天竺三藏僧經過成都曉五天胡語通大小乘經律論以北天竺與雲南接境欲假途而還為蜀察事者識之繫于成都府其得所記朝廷功第文字蓋曾入內通場者或即其人耶今治西有搖香亭在兵馬司外茶蘼芙蓉之勝甲于內地有海棠池在城南三十里昔時太守賓僚燕賞之地沿地植海棠花爛熳如錦也輿地紀勝云黎州初設茶馬買馬兩務成都

則市于文黎珍叙等州號川馬五代王建大閱于星宿
山官馬八千私馬四千建起家騎士有國之後于文黎
雅茂等州市胡馬十年之間遠及茲數按通畧韓億知
益州移永康鬻馬塲于黎州境上以灌茂地接蕃部歲
來互市覘我西川故徙于此舊載在川南以今度之與
大渡河相近但今市馬者由川北之中江縣而轉販入
黎雅其時勢與事不同如此 志云聖鐘山下有古城
昔人于山中聞鐘聲及五色光掘之而得巨鐘故曰聖

鐘山城即古黎州城也又云古黎州城在大渡河外按
元和志南唐以來徙治大渡河內而水源在城外韋臯
始築今城東西南三面隣絕澗惟北面稍平地多井泉
與諸城鎮戍烽火相通誠西南之險要矣志云韋臯
所築土城國初安慶侯即故址砌為石城今大渡河守
禦千戶所是也在司治西北隅大渡河源出吐蕃經
黎州城南九十里東注嘉定入於江臨河有大渡巡檢
司戍之隋大渡縣設焉今廢為鎮若唐之大渡縣則接

蘆山縣界 方輿云唐時大渡之戍一不守則黎雅卬
嘉成都皆擾宋初建隆三年王全斌平蜀以圖來上議
者欲因兵威復越巂藝祖以玉斧畫此河曰外此吾不
有也于是為黎之極邊昔時河道平廣可通漕船自玉
斧畫後河之中流忽陷下五六丈水至此澎湃如瀑
從空而落春撞號怒波濤洶湧船筏不通名為噎口殆
天設險以限中外也父老云舊有寨將欲載杉木板由
陽山入嘉定貿易以數片試之板至噎口為水所舂沒

湏臾片片自沫水浮出蠻人聞之益不敢窺伺矣 寰宇
記云大渡河在通望縣南一十五里自吐蕃界經雅州
諸部落至當州東流入縣界志云廢通望縣在司治東
南九十里其北有羅目溪水入峨眉有通望山自大渡
河南與衆山相連入雋州按通望本漢旄牛縣地在大
渡河北漢水西今有古旄牛城在俗呼為牛頭城語訛
也隋大業二年改為陽山縣因縣南朝陽山為名矣志
又云大渡鎮西有陽山廢縣唐初屬登州後屬黎州也

十道志云隋仁壽四年罷大渡鎮置登州大業二年廢登州又立陽山鎮唐武德元年改置陽山縣屬登州貞觀二年割屬雋州開元初改為登臺縣貞元五年十月劍南節度使韋臯遣將王有道等與東蠻兩林苴那時勿鄧夢衝等帥兵於故雋州臺登北谷大破吐蕃青海獵城二節度殺其大兵馬使乞臧遮遮悉多楊朱斬首二千餘級其投崖谷赴水死者不可勝數生擒籠官四十五人收獲器械一萬餘事馬牛羊一萬餘頭足遮

遮者吐蕃驍勇者也或云尚結贊之子頻為邊患自其死也官軍所攻城柵無不降下蕃衆日却數年間盡復
舊州之境貞元十三年五月十七日吐蕃於劍南山馬
嶺三處開路分軍下營僅經一月進軍逼臺登城舊州
刺史豐高任率領諸軍將士并東蠻子弟合勢接戰自
朝至午大破犬戎生擒大籠官七人陣上殺獲三百人
餘被刀箭者不可勝紀收獲馬畜五百餘頭匹器械二
千餘事太和六年李德裕復修邛崃關移舊州於臺登

城以扞蠻夸 華陽國志云臺登縣有孫水一曰白沙
江入馬湖水水經註孫水出臺高縣即臺登縣也南流
逕邛都縣又南至會無入若水 志云孫水俗謂之長
河天全長河西以在孫水之西也九州要記曰臺登縣
有奴諾川鸚鵡山黑水之間若水出其下即黃帝子昌
意降居處水經曰若水出蜀郡旄牛徼外東南至故關
鄜善長注曰按山海經南海之內黑水之間有樹名曰
若木有若水出焉又云灰野之山有樹焉青葉赤華厥

名若木生崑崙山西附西極也淮南子曰若木在建木
西木有十華其光照下地故屈原離騷天問曰羲和未
陽若華何光是也然若水之生非一所黑水之間厥木
所植水出其下故亦受其稱焉若水沿流間關蜀土黃
帝長子昌意德劣不足紹承大位降居斯水為諸侯娶
蜀山氏女生顓頊於其野有聖德二十登帝位承少皞
金官之政以水德膺歷矣水經注又云大度水出徼
外至旄牛道南流入于若水又逕越雋大笮縣入繩山

海經曰巴遂之山繩水出焉東南流分為二其一枝東
逕廣柔縣注於江其一南逕旄牛道至大笮與若水合
自下亦通謂之繩水矣 寰宇記云廢飛越縣本沉黎
之地唐儀鳳四年分漢源於飛越水置縣屬雅州大足
元年屬黎州按志飛越山下有唐時三瑯城即三交城
也疑即古飛越縣矣又云唐飛越縣在舊縣西北百里
飛越山下其山兩面接羌夸為沉黎西境要害之所
方輿云漢水發源自飛越嶺寰宇記云漢水在漢源縣

西百二十里從和姑鎮山谷中經飛越縣界至通望縣
合大渡河不通舟船每至春冬有瘴氣中人為瘧疾
志云漢水俗呼流沙河源出越山流經司南二里東入
于江 方輿云廢琉璃城在大渡河南太和五年節度
使李德裕築以蠻界琉璃溪為名也贊皇又築伏羲城
以制大渡清溪之險按今司南九十里古清溪關乃
章臯所鑿以通好南詔者自此出邛部經姚州而入雲
南謂之南路在唐為重鎮焉五代孫樵云田在賓將軍刺

嚴道三年能條悉南蠻事為樵言曰巴蜀西通于戎南
逼于蠻宜其有以制之者當廣德建中間西戎飲馬于
岷江其衆如蟻前鋒魁健皆擐五蜀之甲持倍尋之戟
徐呼按步且戰且進蜀遇鬪如植橫堵羅戈如林發矢
如蟲皆折刃吞鏃不能斃一戎而况陷其陣乎然其戎
兵踐吾地日深而疫死者日衆即自度不能留亦輒引
去故蜀人爲之語曰西戎尚可南蠻殘我自南康公鑿
清溪道以和羣蠻俾由蜀而貢又擇羣蠻子弟聚于錦

城使習書算業就輒去復以他繼如此垂五十年不絕其來則其學於蜀者不啻千百故其國人皆習知巴蜀土風山川要害文皇帝三年南蠻果能大入成都門其三門四日而旋其所剽掠自成都以南越嶲以北八百里之間民畜為空加以敗卒貧民持兵羣聚因緣劫殺官不能禁由是西蜀十六州至今為病自是以來羣蠻常有屠蜀之心居則息畜聚粟動則練兵講武而又俾其習於蜀者伺連帥之間隙察兵賦之虛實或聞蜀之

細民苦於重征且將啓之以幸非常吾不知羣蠻此舉
大劍以南為國家所有乎每歲發卒以戍南者皆成都
頑民飽稻飫豕十九如瓠雖知鉦鼓之數不習山川之
險吾嘗伺其來朔風正嚴緩步坦途日次一舍固已呀
然汗矣而況歷重阻即嚴程束甲而趨拔戟而鬪耶加
之為將者刻薄以自入餽餽者縱吏以鼠竊縣官當給
帛則以苦而易良當賑粟則以砂而易粒如此則邊卒
將怨望之不暇又安能殊死而力戰乎此巴蜀所以為憂

也樵曰誠如將軍言苟為國家計者孰若詔嚴道沉黎
越雋三城太守俾度其要害按其壁壘得自募卒以守
之且兵籍於郡則易為役卒出於邊則習其險而又各
於其部繕相美地分卒為屯春夏則耕蠶以資其衣食
秋冬則嚴壁以俟其寇虜連帥即能督之歲遣廉白吏
視其卒之有無劾其守之不法者以聞如此則縣官無
餽餉之費奸吏無因緣之盜兵足食給卒胥無怨於將
軍則如之何田將軍曰如此何患遂書以記之按予議

撤威茂戍軍聽其自募實本此策而日後有求復者讀
是書庶幾瞭然矣 寰宇記云諸葛武侯祠在州城北
三里志云州北三里有武侯城侯築故壘壕塹猶存紹
興中重建侯祠名天威廟又作二室以祀唐韋臯李德
裕二節使 碑目云黎州西林寺壁間題云回道人行
一千五百里謁金菴上人不遇而去志云陶道人得
道處在司東北百里獅子山按道人黎州卒蓋知龍妖
者詳見畫苑 方輿勝覽云州東十里蘭若寺前有龍

池方廣十數丈池上有龍祠水中有枯楂三株隱然如龍
狀觸之則暴風卒雨變於俄頃歲旱取湫立應按志
有渥洼池在州之蠻部內池產龍馬其前後之田高腴
可耕疑即此處矣又有馬跑泉相傳肉齒和尚乘白馬
至一山馬渴跑地泉為之湧人稱其地為和尚山云勝
覽以為山在州東南百里與峨眉瓦屋號為三乘山常
現五色毫光也志云司治五里有邛徠山言邛笮之
人入蜀從此山而來也亦界山矣漢書作邽華陽國志

作岷水經作來開路記作萊其說不同方輿勝覽距州
七十里邛岷關昔有楊氏婦造閣其上傍有閣道碑水
經注云漢武元封四年以蜀郡西部邛笮縣理旄牛道
天漢四年置都尉主外羌在邛來山表自蜀西渡邛笮
其至嶮有弄棟八渡之難楊母閣路之岨是也漢書
王陽為益州刺史行部至邛岷九折坂歎曰奉先人遺
體奈何數乘此險後以病去及王尊為刺史至其坂問
吏曰此非王陽所畏道耶吏對曰是尊叱其馭曰驅之

王陽為孝子主尊為忠臣今有祠在山下又有叱馭橋
在司境內太守李石為碑記云九折坂峻絕造天曲迴
九折乃得度其巔九夏凝冰冬絕行迹也 志云邛崃山
靈應將軍洞不知何神有錦文巨蛇蟄其中人恒見之
按九折坂地里諸書以為在百丈驛想必後人移置近
界矣 勝覽云筧山在州西北五十餘里有前筧後
筧以山多筧故名春時州人百十為羣入山斫取紹興
間始立筧租以贍學歲收緡錢八十千土人名為錢筧

山 勝覽又云白崖山在州西北二百五十里山外即
生番界嶮峻不通人跡志云在西北二十里山之右有
風穴如井不知淺深穴口四圍津津如汗間有氣出騰
空如白雲須臾風起怒號如雷里人見雲即知風氣散
則風定細則風小盛則風猛室其穴風雖少而民多瘴
開之風如故而瘴亦衰山之北又有穴大如車輪俯而
入其中空濶數十步泉聲琮琤石體凝結其幽致不可
名狀俗呼仙人洞即此 張華博物志云蜀南沉黎高

山中有物似猴長七尺能人行名曰獾路見婦人輒盜
之入穴俗呼為夜叉穴西蕃部落最畏之按寰宇記謂
在漢源縣境或即邛崃山中耶記又謂山峽有一石洞
壁間有夜叉像土人祠之號穿崖將軍洞按在今慶歷
鄉 唐李義府奉使招諭有懷贈同行人詩云遠遊冒
險阻深入勞存諭春去辭國門秋還在邊戍軒車行未
返節序催難駐陌上悲轉蓬園中想芳樹蜀山自紛糾
岷水恒奔注臨泛多苦懷登攀寡歡趣永夕飛淫雨崇

朝蒸毒霧不求綏嶺桃寧美邛鄉蒟白狼行欲靜驄
馬何常驅願接軺旆塵聯翩來北驚宋知郡余授詩絕
塞邛崃外偏城越雋東山含初夏雪林偃夕陽風提刑
李師錫詩窮冬按部極西陲鳥道盤空積雪迷報國憂
民寧憚遠萬重山裡到沉黎 寰宇記唐乾元中黎州
所統五十州皆徼外生獠羈縻而已其名曰羅巖州
索古州秦州上州輒縈州劇川州合欽州下蓬州栢坡州博
盧州明川州朮朮州蓬矢州大渡州米川州木屬州河

東州諾雅州甫嵐州昌明州歸化州象川州藪夏州和
良州和都州附樹州東川州上貴州滑川州北川州古
川州甫萼州北地州蒼榮州野川州印陳州貴林州護
川州牒琮州浪彌州郎郭州上欽州時蓬州儼馬州擲
查州印川州護印州脚川州開望州上蓬州北蓬州剝
重州久護州瑤劍州明昌州按只五十四州少一州承
舊唐書之誤也時代已遠或鞠為邱墟或荒為部落或
為闕堡別名皆不可攷 經畧志曰黎雅諸夸即天全

六番諸部散居二州之間者宋時屢為邊患孝宗乾道四年威州保寧縣探知風流等部欲入抄掠知縣張文禮閉絕蛇浴山路不許來往蕃從蛇浴嶺後斫生路至村攘劫宣撫司委知永康軍李繁等討之蕃部來降十一月砂平蕃首高志良至碣門互市與居民鬪山鷗不勝乃詣寨官喻炳陳訴炳決責之志良啣恨去明年正月來攻碣門制置司遣李俊禦之兵未至志良已有悔意欲償還所燒廬舍更以錢贖罪守臣不能身任其事

付之兵官兵官既欲邀功而喻炳亦覲報怨遂潛入砂
平焚其屋廬蕃人初皆潛伏官軍乘勢虜掠蕃鳴角聚
衆以出遂失利蕃人追至榮經蘆山而還乾道九年青
羌吐蕃奴兒結等坐黎州負其馬價侵掠安靜寨推官
黎商老等禦之敗死安撫司委鈐轄李彥堅往援始赴
州悔罪買馬如故十一月復犯安靜至大小壩殺虜軍民
千餘黎州守邵降年及通判呂宜之招邛部川蠻兵併
力擊之乃遁淳熙二年五月奴兒結等同元人漢人詣

州州犒之然以互市久不得通方怨望而白水寨將王
文才又與婚姻誘之搶掠知黎州陸東之計臬文才于
市我明於黎州設安撫司天全六蕃設招討司蓋以夷
治夷之意也自洪武至今邊方以靜雅州所屬與招討
夸人或時有爭訟者蓋境土相連勢使然耳 四夸考
云洪武初黎州長官司土舍馬芍德征討有功加陞安
撫司以芍德為安撫副使萬歷十九年副使馬祥無後
其妻瞿氏掌司事取瞿姓子撫之將有他志祥姓土舍

應龍居松坪遂興兵攻城取印番衆因而乘會剽劫于
時叅將吳文傑方有征東之役移師剿平之二十四年奏
將該司降為土千戶所安撫降為千戶於司南三十里
大田山壩立千戶所俟應龍之子新受承襲司署改為
黎雅遊擊府上七枝編為民戶屬大渡河千戶所當差
下七枝仍舊屬松坪馬氏約束焉大抵司東三十里為
天冲山險絕無路止通樵採而已唐古木碑所云沉黎
界上山林參天嵐霧晦日者也西二十里為黑崖關關

外係本司管轄上七枝等夷又一路由椒子岡至冷磧寨直抵長河則為大西天烏思藏進貢路南去大渡河可八十里中立文武銷瘴香樹黑石流沙等堡直抵瀘河近河有避瘴山夏秋之交境多嵐瘴飛鳶羣集至立冬前瘴已乃飛去土人避瘴恒以鳶為候故名銷瘴山也東南則安撫所轄下七枝熟夷之界其名曰落凶曰吽哄曰沙罵曰俺立曰母姑曰阿輝曰他他又自炒米城以抵松坪寨連接峨眉凡三百六十里高山峻坂密樹

深箐為安撫族人居之按九州志黎州石樓之地多長松不生雜木即松坪寨是也志云司南百里臨大渡河有韋臯所築要衝城俗呼沙米寨亦作炒米城矣

峨眉

峨眉縣邊隣松坪木瓜大小赤口等處原設六鄉西南二面臨夷三十里至高橋十里至土地關二十里至龍池場二十里至大圍關及中鎮巡檢司五里至鐵索橋五里至射箭下坪三里至射箭上坪此縣之舊界也

坪外八里至黑龍溪四里至虎皮岡始分兩岐右路由上馬勝溪至金口廠為印部司新附籍之民名歸化鄉有陽化堡設焉由金口廠二十里至楠木園五十里至天池八十里至萬家石三十里至松坪則黎州土舍馬應龍所居矣左路由下馬勝溪至古金寺渡中鎮河有中鎮巡檢戍之又十七里而至太平墩墩又兩岐右路過楊村行百里乃至獠獠獠亦新附夷種也左路上蠻鬼岡岡勢險峻樹木叢雜入冬徂春煙霧不收雨雪

層積即夷人亦鮮踪跡又十五里至空木即永寧墩八里乃至栖雞坪今築平夷堡處城池候館咸備焉由栖雞五里至冷溪二十里至熱水河十里至四百囤又二十里而至西河設有鎮遠墩過墩四十里為殺馬溪懸崖峭壁中逼河流人過此者兩頭牽索緣索而步至下山處名為溜馬槽又五十里則木瓜夷種之巢穴也木瓜有二有木瓜旁通西赤口去煖歹只二日過木瓜橋頭稍前十里為大木瓜即今三枝降夷處所一枝

凶瓜一枝匪瓜一枝卜特瓜過大木瓜五十里為利濟
山極高峻與大涼山相接又五十里至大赤口口外則
馬湖之地矣

原闕

之先分自大赤口凡十二枝賦乃卜

特其最著者世居西河屬馬湖土官安氏鈐轄自改流
日諸瓜叛入邛部歸嶺氏其地自西河至大小赤口涼
山雪山等處周圍蟠據北連建越西接嘉峨南通馬湖
窟穴蹊徑四藏而八達焉嘉靖末諸瓜畜牧蕃盛心懷
內擾邛部長官嶺栢已不能馭及死其妻馬氏為政賦

乃虐栢等叛出涼山會同西河匪爪白祿出沙坪於是
嘉峨犍為一帶鄰邊居民不能安枕建昌上下南三道
督印部發兵至苗雞坪截殺之我師未集潛從泠溪而
渡直搗苗雞坐制我死命而爪鋒於是益熾矣乃議大
征分為建越馬湖中鎮三路而進直搗巢穴爪始惶駭
請降軟血自誓不復反主將檄令各推酋長納貢罷兵
於是凶爪推牛撒為長匪爪推阿書為長卜特推阿魁
為長愿各約束其部落永作屬夷歲貢良馬三匹匹輸

三金峨眉縣為進之十三枝爪夷積聚虛實牛多不過
六七十頭馬四五十匹羊二三百隻耳歲費官兵糧餉
三千二百五十兩有奇恢復侵占田地自七盤子至米
麻嶺共四千八百六十四畝歲徵租可四百四十七石
有畸說者謂其常圖恢復云

雅州

禹貢和夷底績雅安志云和水在州南四十里源出蠻
界羅巖州而入平羌江圖經云和川路在巖道縣界西

去吐蕃大渡河五日程從大渡河西郭至吐蕃松城四日程羌蠻混雜連山接野鳥道蟠空不知里數 寰宇記云雅州管和川夏陽等羈縻四十六州其首曰羅巖州去當道四百八十里曰當馬三井東鋒名配鉗恭斜恭畫重羅林籠羊林波林燒龍蓬索古敢川驚川蝸眉木燭百坡以上十八州去雅州近者四百餘里遠者不及五百里去羅巖自一里至六十里為極惟當馬去羅巖二百里焉 曰當品巖城中川鉗矢昌磊鉗并百頗

會野以上八州去雅州近者二百六十里遠者六百三十里去白坡近者三里遠者六十里 曰當仁推海作重禍林諾笮金林平恭布嵐欠馬羅蓬以上十州去雅州近者五百七十里遠者六百二十五里去會野近者三里遠者六十里通羅巖共三十七州和川路之界也其次曰論川州去當道五百八十里曰遠南州去讓川州二十五里至州五百六十里卑盧州去夔龍州二十里至州五百六十里夔龍州去卑盧州二十里至州五百

六十里耀川州去金川州一十五里至州五百六十里
金川州去耀川州一十五里至州五百六十五里東嘉
梁州去金川州二十里至州五百六十里西嘉梁州去
東嘉梁州一十五里至州五百六十五里通論川共九
州夏陽路之界也 寰宇記云貞元中吐蕃七部落來
降界近雅州因安置於和川等路其名曰吐蕃籠官楊
矣蓬費東君等部落六十人在蠻宿川安置吐蕃業城
首領籠官劉矣本等部落在本部安置吐蕃會野首領

籠官高萬唐等部落在本部安置吐蕃逋租城首領籠官馬
東煎等部落在夏陽路安置吐蕃國師馬定得并籠官馬德
唐等部落在欠馬州安置吐蕃嘉梁州降戶首領籠官劉定
等部落在夏陽路安置吐蕃鬼籠城首領鑠羅莽酒等部落
在和川路安置按宋史雅州西山路蠻有部落四十六唐以來皆
為羈縻州太平興國初首領馬令膜等來貢并上唐朝勅
書告身凡七通咸賜冠帶其首領授以官 上南志云雅州
通西番路有三曰靈關硯門始陽也而硯門最為要害按靈

關鎮在廬山縣北八十二里蜀都賦廓靈關而為門是矣四夷攷云碣門等處安撫司元時設在雅州尋改吐蕃宣慰使司國初宣慰余思聰王德貴歸附始降司為州又碣門百戶所設近天全六番之界所有茶課司以平互市之官也 志云始陽山在蘆山縣東十里俗呼羅繩山寰宇記以為蒙山西魏置始陽縣於此楊用修云史記西南夷傳自嵩以東北君長以十數斯笮都最大注斯及笮都二國名也徙音斯相如難蜀文略斯榆謂斯與標榆

也此斯即南西夷之徙玉篇作郛注狄國夏為防風氏
周為髣漢之寶叟地在蜀之邊也 圖經廬山縣新安
鄉五百餘家獠種也其婦人娠七月而產置兒向水中
浮者取養沉者棄之千百無一沉者長則拔去上齒加
狗牙各以為華飾今有四牙長於豬牙而唇高者別是
一種能食人無長齒者不能食人俗信妖巫擊銅鼓以
祈禱焉 土夸考云榮經縣界懸厓棧道之間有雜道
長官司及飛越廟縣西北有紫眼夷編氓殆半里其地

名紫眼關與西番相接廣可四十里袤百里自甕溪飛
水小路直透冷磧番以上關堡大渡河官軍戍之東西
峻嶺中流一河大壩筒車等五姓夷結茆以居五姓各
立老人有訟不立公庭惟聽老人處分而已然賦稅亦
不後時蓋為茶商捷徑有利存焉正西萬里乾河直通
碣門則大全招討之地矣 陳子昂諫雅州討生羌書
將仕郎守麟臺正字臣陳子昂昧死上言竊聞道路云
國家欲開蜀山自雅州道入討生羌因以襲擊吐蕃執

事者不審圖其利害遂廢梁鳳巴蜒兵以徇之臣愚以
為西蜀之禍自此結矣臣聞亂生必由怨起雅州邊羌
自有國以來未嘗一日為盜無罪受戮其怨必甚怨甚
懼誅必蜂駭西山盜起則蜀之邊邑不得不連兵
備守兵久不解則蜀之禍構矣臣聞吐蕃桀黠之虜君
長相信而多姦謀自敢抗天誅以來向十二餘載大戰
則大勝小戰則小勝未嘗敗一隊亡一矢國家徃以薛
仁貴郭待封為越武之將屠十萬衆於大非之川一甲

不歸又以李敬玄劉審禮為廟廊之宰辱十八萬衆於青海之澤身為囚虜是時精甲勇士勢如雷雲然竟不能擒一戎馘一醜至今而關隴為空今乃欲以李處一為將驅顛顛之兵將襲吐蕃臣竊憂之而為此寇所笑且夫事有求利而得害者則蜀昔時而通中國秦惠王欲帝天下而并諸侯以為不兼實不取蜀勢未可舉乃用張儀計飾美人譎金牛因間以啖蜀侯果貪其利使五丁力士鑿山通谷棧褒斜置道於秦自是險阻不關山

谷不閉張儀躡踵乘便縱兵大破之蜀侯誅實邑滅至
今蜀為中州是貪利而亡此往事也臣聞吐蕃黠寇愛
蜀之珍富欲盜之已有日矣然其勢不能舉者徒以山
川阻絕瘴隘不通此其所以頓餓狼之喙而不能竊食也
今國家乃亂邊羌開隘道使其收奔亡之種為嚮導是
以借寇兵而為賊除道舉全蜀以遺之此危道也蜀西
南一都會國家之寶庫天下珍貨聚出其中又人富粟
多順江而下可以兼濟中國今執事者乃圖僥倖之利

悉以委身西羌得西荒地不足以稼穡財不足以富國
徒殺無辜之衆以傷陛下之仁糜費隨之無益聖德又
恐僥倖之利未可圖也夫蜀之所寶恃險者也人之所
安無役者也今乃開其險役其人險開則便寇人役則
傷財臣恐未見羌戎已有姦盜在其中矣往者益州長史
李崇真將圖此奸利傳檄稱吐蕃欲寇松州遂使國家
盛軍以待之轉餉以備之未二三年巴蜀二十餘州騷
然大弊竟不見吐蕃之面而崇真贓錢已計巨萬矣蜀

人殘破幾不堪命此之近事猶在人口陛下所親知意者必有姦臣欲圖此利復以生羌為計者哉且蜀人阨劣不習兵戰一虜持矛百人不敵當又山川阻曠去中夏精兵處遠今國家若擊西羌掩吐蕃遂能破滅其國奴虜其人使其君長係首北闕計亦可矣若不到如此臣方見蜀之邊陲不守而為羌夷所橫暴昔辛有見被髮而祭伊川者以為不出百年此其為戎乎臣恐不及百年而蜀為戎也

天全六番招討使司

古氏羌之地晉以前無聞焉宋齊梁土豪迭相雄長名屬益州西魏為始陽縣地屬蒙山郡後周因之隋初郡廢屬雅州唐為羈縻州隸雅州都督府總志云五代王孟之間有高曩閣藏楊夾失朶只見二首歸附始置碉門黎雅長河西魚通寧遠六軍民安撫司宋隸雅州元憲宗時復置六安宣撫司屬吐蕃等處宣慰司後改六番招討司又分置天全招討司國初併天全六番招討

使司隸四川都司 其地東西廣百九十里袤二百一
十里東至雅州界五十里西至長河西司百四十里謂
之乾溪南至榮經縣界六十里北至靈關道及董卜韓
胡百五十里去成都五百四十里為南詔之咽喉轄部
落凡六曰馬村蘓村金村楊村隴東村西碕村或謂六
番之名始此非五代碕門黎雅等六名也 上南志云
洪武六年詔西夷酋長至京授職賜印因俗為治立都
指揮使司二曰烏思藏曰朵甘指揮使司一隴答衛也

宣慰司三朶甘及董卜韓胡長河西魚通寧遠也招討
司六萬戶府四及別思寨安撫司木瓦都指揮葛刺湯
千戶諸部落是為三十六種以時朝貢焉 志云天全
招討司設在碉門城即元之碉門安撫司也中有碉門
百戶所屬雅州千戶設在正副二招討及朶甘宣慰界
渡河以西又有真官招討司及魚通安撫冷磧十八寨
為三十六種番夷出入之路 志又云司治有諸葛武
侯廟治東二十里有臥龍山相傳武侯征孟獲駐宿其

上又十里有泉從石龍口噴出謂之龍泉其源發大悲寺內寺在司東四十里又十里則多功山也昔大禹疏鑿以通峽水故名志又有鎮西山姜維伯約駐師其下在司東二百十里又二十里有女城山相傳楊招討家女將守此壘石為城尚存又有玄公白厓皆出聖燈芝草玄公高峻清絕在東南八十里白厓矗立如雪在司南里餘近白厓又有玉壘窮冬積雪土人以玉堡呼之圖經自長河西至董卜寨二百餘里皆遶雪山而行路

由打箭爐而進有哈日寺在烏思藏中元世祖欲郡縣
六番之地以吐蕃僧八思巴為大寶法王帝師領之嗣
者數世其弟子賜號司空司徒國公佩金章玉印前後
相望大寶法王而下有大乘法王闡教王闡化王護教
王護法王通謂之烏思藏六番也以其地連天竺有大
西天小西天之域焉雪山盡處有大鐵圍山山有法佛
德行刺麻等寺游梁雜紀云烏思藏所產細畫泥金
水幅佛像銅渡金佛像金塔舍利各色足力麻鐵力麻

璿璿左髻犀角珊瑚啖其貢道由董卜韓胡長河西
朶甘思之境自雅州入京大乘大寶二法王差僧徒闡
化闡教補教贊善進之 志云天全男不習工藝婦不
事紡績惟以耕種為業畚漢清居硲房絕嶺治化漸摩
禮義日生 元段平章夫人高招討女也能詞賦其勸
段氏効順息兵一章見詞話中國朝弘治間招討高崧
妻楊氏楊顯昭女二十而寡始終不易志詔旌其門又
硲門百夫長姜珏女適於王佐生一女適高昂母子二

人俱早寡從一不變人稱雙節之家蓋姜氏女七歲時
隨母赴京奏茶課因進為宮人七日不樂召其母賞鈔
令引還鄉即適王佐者閨壺節義可謂盛矣惟是二氏
當替襲之期徃徃告許申勘動煩郡邑由嫡庶之分不
明也如滇之土官宗枝冊貯自藩司則無此事

蜀中廣記卷三十五

欽定四庫全書

蜀中廣記卷三十六

明 曹學佺 撰

邊防記第六

下川南道

叙馬瀘道開府馬湖統轄叙瀘二衛烏蒙烏撒東川鎮
雄永寧等府司叅將一員駐劄永寧遊擊一員駐劄建
武寔左右之但永寧者兼貴州迤西等處地方故稱川

貴叅將云漢書西南夷傳唐蒙至夜郎夜郎旁小邑貪
漢繒帛以為漢道險終不能有也乃且聽蒙約還報以
為犍為郡治道自犍道至牂牁水經若水又東北至犍
為朱提縣西瀘江水酈道元曰朱提山名也應劭曰在
縣西南以氏馬犍為屬國也在郡南千八百許里建安
二十年立朱提郡郡治縣故城郡西南二百里得所綰
堂琅縣西北行上高山羊腸繩屈八十餘里或攀水而
升或繩索相牽而上緣陟者若將階天又有牛叩頭馬

搏頰坂其艱險如此也 舊志唐置晏高筠定連隆鞏
等十四州隸戎州都督府唐末廢四州存十州宋神宗
時十州夷內附隸瀘川郡前晏高等州皆在焉元置戎
高鞏筠連四州隸叙州宣撫司至元十三年宣撫使咎
順招諭箇長得蘭紐得貢卧等率衆歸附因設大壩總
管府得蘭紐授都總管得貢卧充同知其羅星長官
以黎川同知李奇為之上下羅計二千戶俱得姓者為
之 輿地志曰叙州三路蠻西北曰董蠻正西曰石門

部東南曰南廣蠻董蠻在馬湖江右僂侯國也其酋董氏南廣蠻在慶符縣石門蕃部與監洮土羌接唐興播等十二州之地其人精悍善戰鬪自馬湖南廣諸族皆畏之蓋古浪稽魯望諸部也 志云宋大觀中夷酋羅

永順楊光榮李世恭等各以地內屬詔建滋純祥三州在慶符縣西元史四十六國蠻夷所領永城夷地在慶符南唐定州之支江縣也其長官司在高縣西三十里落騷鄉文獻通考云獠蠻不辨姓氏所生男女長幼次

第呼之其丈夫稱阿謨阿改婦人阿夷阿等之類今稍從漢俗易為羅楊等姓依樹積土以居其上名曰杆欄杆欄大小隨其家之口數杆欄即夷之榔盤也制畧如樓門由側闢構梯以上即為祭所餘則以寢焉又云夷有姓氏男織班布纏頭衣裳俱如華製行纏以班布為之女綰髮為髻纏以班帶簪纏用銀兩耳各穿兩孔上貫釵下貫環富者疊貫之衣尚左衽下著桶裙間以組綵長覆膝下初娶不論物采惟通媒妁殺牛豕以為禮即

引歸惟老死後方大索婚價飲食喜啖蛭蚪又云楚有
姓氏用白練纏頭衣尚青碧背領袂緣俱刺文繡裳袴
覆膝亦織班帶以為行纏嘗佩雙刀善使勁弩女綰髮
撮髻飾以簪壓衫之前後左右文繡灼爛長裙細褶膝
以下亦刺文繡行纏雜以青紫出則著單履性淫婚則
論財喪則戚隣咸聚撾鼓作樂至夜男女雜還自有番
書卜日不同于中國 李京雲南志云白人者漢武帝
開楚道通西南夷道戎州舊縣是也今轉為白人矣白

人語著衣曰衣衣吃飯曰烟羹茹樵採曰折薪帛曰纂
酒曰尊鞍鞞曰倬泥墻曰墉垣男女首戴次工製如中
原漁人蒲笠差大編竹為之覆以黑氊親舊雖久別無
拜跪唯取工以為次男女披氊椎髻婦人不施脂粉酥澤
其髮以青紗分編繞首盤繫裹以攢項黑巾耳金環象
牙纏臂衣繡方幅以半身細氊為上服處子孀婦出入
無禁居屋多為回簷如殿制食貴生如猪羊雞魚皆生
鹽之和以蒜泥而食每歲以臘月二十四日祀祖如中

州上冢之禮六月二十四日通夕以高竿縛火炬照天
小兒各持松明火相燒為戲謂之驅禳 又云土獠蠻
在叙川南烏蒙北皆是男子及十四五則左右擊去兩
齒然後婚娶猪牛同室而居無七筯手搏飯而食之踏
高橈上下山坂如奔鹿婦人跣足高髻樺皮為冠耳隆
大雙環衣黑布衣項帶鐵牌以為飾出入林麓望之宛
如猿猱人死則以棺木盛之置于千仞巔崖之上以先
墮者為吉山田薄少刀耕火種所收稻穀懸於草棚之

下日旋搗而食多以採荔枝販茶為業云 唐書戎州都督府羈縻州九十有二宋初見寰宇記者合叙瀘只載四十餘州而已他不可攷樂子正曰羈縻諸州除沒落雲南蠻界二十五州其餘雖有名額元無城邑散在山峒不常其居撫之難馴擾之易動其為刺史父子相繼無子即以其黨有可者公舉之或因春秋有軍設則追集赴州著夏人衣服却歸山峒椎髻跣足或披氊或衣皮從蠻夷風俗無稅賦以供官每年使司須有優賞不拘文法今並存之要知古跡而已 悅州在

戎州南二百十七里管縣六甘泉青賓臨川悅木夷口胡璠

移州在州西南五百八十七里管縣三移當領河湯

陵扶德州唐開元十八年七月割入在東南四百五

十七里領縣三扶德宋水柯陰筠州在四百一十七

里管縣八鹽水筠山羅余臨居澄瀾臨崑唐川尋源

連州在州西南四百餘里筠州析出管縣六當為都寧

邏遊羅龍加平清坎鞏州儀鳳二年開山洞置天寶

元年改為因忠郡乾元元年復為鞏州在南三百十里

領縣五哆樓比邱都善播郎婆婆按即珙縣地鞏州者
今之羅星渡哆樓者今在城之高樓坊婆婆今江安縣
界之婆婆村比邱今之九寨播郎今貴州界之安靜長
官司都善一名都壇今名梅得此本志所載也 宋州
領縣四戶六十九犵龍犵支宋水廬吾輸納半稅按高
縣西五十里有宋水 南州在州西五百三十五里盈
州析出管縣三播政百榮洪瀘 德州在州南五百六十
四里管縣二羅連萬崖 為州在南四百九十里管縣

二扶僧羅 洛州在南四百二十七里管縣四臨津賓

夷慈藥曾口

志州在西四百五十六里管縣四浮萍

雞惟夷賓河西

盈州在南五百六十七里管縣四盈

州塗賽播陵施燕

獻州在南六百六里管縣七名闕

武昌州在南一十二百一十七里管縣七洪武羅虹

琅林夷郎來賓羅新綺婆婆

景州在南三百九十六

里管縣七名闕

播狼州在南二百八十七里管縣三

播勝從顏順化右十七州唐時隸戎州南廣溪洞獠

協州在州西南八百里天寶中因雲南離叛被破今移
置在西南四百九十三里管縣二名缺 靖州在西南
五百一十里管縣二靖川分協 曲州在西南九百里
天寶中因雲南破移在開邊縣界去縣一百二十七里
管縣二朱提唐興 播陵州在南五百七十七里管縣
二名缺 鉅州在西南四百五十七里元無縣從開邊
縣析出 哥靈州在西南一千四百里管縣三名缺
切騎州在西南一千一百里管縣四柳池奏祿縻託通

識 品州在西南二千三百九十五里管縣三八稗松
花牧口 從州在西南二千六百四十二里管縣六茫
化昆池武安羅林梯山南寧 碾衛州在西南九百九
十七里管縣三名缺 涪州犸違州俱歸馬湖右十二
州管縣三十七唐時在石門路並無稅賦供輸相承在
圖經上標名額耳石門今叙州之慶符縣也 長寧州
領縣四戶三十八婆員婆居青盧羅門 涪州久視元
年置領縣二戶一十五新定固城 高州領縣三戶二

十一河巴移甫徙西按長寧洧州俱長寧地高州今之
高縣也 晏州儀鳳三年開生獠置天寶元年改為羅
陽郡乾元元年復為晏州領縣七戶七十七思峨柯陰
新賓扶來哆崗羅陽思晏按興文縣有晏峯即思晏縣
也七縣今為砦矣 定州領縣二戶一十六支江扶德
按筠連有定川溪舊州治在溪南 薩州儀鳳二年招
生獠置天寶元年改為黃池郡乾元元年復為薩州領
縣三枝江黃池按珙縣圖有薩州即上下羅計納州儀

鳳二年間山洞置天寶元年改為都寧郡乾元元年復為納州領縣七戶百六十八羅圍播羅施陽羅當羅藍都寧羅掌邊徼溪洞輸納半稅按珙縣有都寧驛與建武相近 奉州儀鳳二年置領縣三戶三十九柯里柯巴蓬羅按宋史奉州乃瀘州部西南邊夷 思峨州天授元年置領縣二戶三十七多溪洛溪按瀘州憲綱有思峨洞已上供輸洧井鹽紫竹也 藍州儀鳳二年置領縣一胡茂 順州載初二年置領縣四戶五十九曲

水順山靈巖來猿以上輸納半稅 能州大定元年置領
縣二曲水甘泉 沂州儀鳳二年置領縣四沂源越賓
洛川鱗山以上連接黔府生蠻承前不輸稅右十三州
唐時隸瀘州

建武千戶所

春秋僉侯故地漢為西南夸部叛服不常諸葛武侯征
撫之置銅鼓埋鎮諸山稍就帖然唐儀鳳間開拓夷徼
於本部置晏州羅陽郡領七縣宋熙寧間晏州儀夷獻

地隸瀘州郡政和間夷卜籠謀叛據五斗壩後據九絲
天險號九絲山都掌元至正間本部歸附陞為戎州統
轄水都四鄉山都六鄉本朝改州為縣隸叙州府水都
則陽順陰逆山都則猖獗日甚先後凡十有二征俱弗
克萬厯元年剿平之用兵九閱月告成事始改戎縣為
興文水都震懼悉歸編戶於山都六鄉適中處建武寧
城拓地五百餘里東至永寧宣撫太平長官司八十里
西至珙縣百五十里南至鎮雄府安靜長官司八十里

北至叙府長定縣百五十里設鎮守總兵安邊同知坐
營守備及建武守禦千戶所環四山而翠連雲貴襟三
水而清派叙瀘招集流移建學育才夷風丕變矣萬厯
丙申丁酉間虜酋火落赤率其部入寇松潘乃移總戎
之西改設遊擊於建武兵亦移入松而所存無幾焉
武寧蠻好著芒心接離名曰苧綏嘗以稻記年月葬時
以筭向天謂之刺北斗相傳盤瓠初死置於樹以筭刺
之下其後為象臨本志云平蠻城即九絲城辟立萬仞

周圍三十餘里上有九崗四水極廣可以播種僅通一徑鳥道真天險也去鎮一十五里為左榜山今立頭腰尾三堡墩矣大壩總管府元至元十三年蠻夷宣撫使答順遣官招諭戎州酋長得蘭紐得貢卧率欽蠻民歸附十七年朝見遂設大壩總管府得蘭紐投都總管得貢卧充同知其羅星長官以黎州同知李奇為之上羅計夷酋得賴阿當以至元十三年歸順授上羅計蠻夷千戶下羅計夷酋得顏箇以至元十三年歸順授下

羅計蠻夷千戶

馬湖府

寰宇記戎州都督更有羈縻州五按即今之馬湖屬也
其在唐或隸戎州或隸石門路 馴州在戎州西北七
百三十三里管縣五馴祿天池方陀羅藏播騁 騁州
在西一千三十三里領縣二斛木羅相 浪州在西一
千三百四十三里貞元十三年五月十七日西川節度
使韋臯奏置管縣五名缺右三州在馬湖江 瀉州在

南九百一十二里管縣三拱平掃空羅空 牻違州在
南九百三里管縣三牻連羅名新戍右二州在石門路
土夸攷云馬湖即牻牻地也舊有牻浪騁瀉牻違五
州屬馬高州在府東南百里外屬叙州府猶有故址可
尋而牻浪騁之在西南者計三千里外與建昌印部相
連漫無所考牻違州亦府西界總之昔為羈縻而已國
初安濟歸附授土知府五傳至安鰲而叛改流官為弘
治九年詳靖邊錄中仍以泥溪沐川平夷蠻夷四長司隸

之泥溪平夷皆王姓蠻夷文姓沐川悅姓也環而星列
于外萬曆十七年始設屏山縣附郭焉東界叙府百一
十里西界建昌千二百里南界烏蒙百四十里北界犍
為二百里 水經注曰犍縣故犍為郡治也縣有犍山
晉建興元年置平夷郡有犍水出犍邑西不狼山東與
溫水合溫水一曰煖水出犍為符縣而南入犍水犍亦
出符縣南與溫水會闕駟謂之闕水俱南入犍邑犍水
於其縣而東注于延水延水又與漢水合出犍為漢陽

道王莽之新通也按甓縣半屬平夷地矣 土夷考云
泥溪傍府而居其東西北三面連接烏蒙與獼狢雜處
所受田賦與華民一體奉征調可得夷兵三百人受寧
戎巡檢司約束 平夷地土最狹錯於泥溪蠻夷之中
相去各四十里東去泥溪三十里有書樓峯我朝薛文
清公瑄父為平夷司吏目隨任讀書於此 蠻夷司民
少夷多故以名司其夷種有四山龍源青岡黃郎磨坡
等處與建昌烏蒙沙罵接運有征調可得夷兵千設有

檜溪烟溪三堡及龍源巡檢司防守去司治二十里有
水海舊有龍生於水中馬湖得名本此 沐川司東界
宜賓北界犍為南界泥平蠻三司西抵建昌越舊邛部
安邊廳守備司皆其轄內地故最廣田土亦饒而民狡
好訟離府可三百里過此自西迄北大涼山以外盡皆
夷地文法所不能盡拘耳 安邊廳在新鄉鎮即賴因
鄉也東接犍為南接本府各二百里西接建昌千三百
里北接大涼山五百里十六年馬湖改流于此建城垣

設安邊同知一員駐劄其間又于烟草峯設守備司以資彈壓北有水池為後營南有大河壩為前營中有兩河為中營三營官兵約千四百四十餘人以成犄角之勢蓋于諸夷所出沒處扼其吭而守之也其水池一帶則界老鶯山大河壩一帶則界大涼山雷坡黃郎等處則界分水嶺庶幾西陲一雄鎮云

瀘州衛

洪武初調陝西長安衛軍征雲南回使駐守瀘州成化

初以都掌之亂遷于宋江渡按在州南百里城週三百丈去衛南一舍有洞歸堡兩舍有定遠堡三舍有太平堡東南百里有水峽堡北五十里有江門堡百三十里有太州堡西北六十里有三層堡又二十里有渠壩堡其地東連羅羅界子北抵九支挫州西通長戎九姓馬湖建昌南接東川芒部烏蒙烏撒蓋西南夷要害之防也本志東抵永寧衛西至九姓長官司各十里南至太平長官司五十里北至納谿縣界四十里轄左右中前

四千戶所

烏蒙軍民府

古為竇地甸漢為牂牁郡地唐時烏蠻仲牟由之裔曰
阿統者始遷於此地甸至十一世孫烏蒙始強號烏蒙
部宋時封阿朶為烏蒙王元初歸附至元間置烏蒙路
隸烏撒烏蒙等處宣慰司其時李京景山為宣慰副使
兼管軍萬戶即著雲南志略者元末彼土有阿普者仕
為總管洪武初招集隣酋效順於是改宣慰司為軍民

府用阿普為土知府設流官通判經歷照磨各一員隸
四川布政司屬川南道編戶一里而已其人有羅羅夷
人土獠三種錯雜而居男子年十四五則擊去左右兩
齒乃娶出入佩刀相見以去帽為禮架木為棚以居東
西廣五百一十五里南北袤七百六十里東至烏撒府
界二十五里西至建昌衛界四百九十里南至東川府
界百三十里北至叙州府界六百三十里至成都千三
百里 志云鍊爐山在治東三里以形似名涼山在西

百里高廣千尋絕頂平曠蠻人避暑之地也雪山有積
雪春夏方消在府西百三十里其西南有撒由河源出
淨山北流與龍洞河合龍洞河在司東北一舍源出石
洞中以為洞者有龍金沙江在西南二百里外源出吐
蕃流入府界與馬湖江合 志又云夸語以五為我以
橫為未東二十里即我未山有五峯橫列故名 以平
坦為朴窩東南一舍有朴窩蓋四望平坦也 以相對
為博特東南十五里有博特山以與府山相對也 以

陡峻為撒途東北八十里一山峻絕故曰撒途山

東川軍民府

古東川甸烏蠻仲牟由之裔罵彈得之改曰那札那夷屬
南詔蒙世隆置東川郡後烏蠻悶畔疆盛自號畔部元
初置萬戶府至元中改為悶畔部軍官後改為東川府
隸烏撒烏蒙等處宣慰司洪武初仲牟由之裔祿氏設
姑歸附仍授為東川土知府隸雲南布政司十六年改
為東川軍民府添流官通判經歷照磨各一員立營長

六頭目九管攝其間隸四川布政司屬川南道編戶一里元志云東川有烏蠻白蠻獋人羅羅四種烏蠻富而強白蠻貧而弱居多版屋俗尚戰爭類土蕃之風獋羅通詔之夷人而羅即獋也性勁而悍摘鬚束髮於頂覆以白布尖巾衣以氊履以革獋人椎髻披氊戴氊笠用氊裹其脛躡皮履以貿易為業東西廣四百二十里南北袤三百七十里東至烏撒界百二十里西至會川界三百里南至雲南尋甸府界二百二十里北至烏

蒙界百五十里至成都千四十里志云府治在萬額山下山形上濶下銳如猪治內有大石如牛卧叩之有聲夷人以為石鼓也治南有白婆山山頂有四時泉西五十里納雄山夜靜時聞人聲以為神也歲五穀熟必於此告成焉 東川大王祠蒙氏所建絳雲弄山之神也山高峻可百里有十二峯下臨金沙江在府西南二百里一名烏龍山 金沙江一名納夷又名黑水源出雲南武定府下流入濟慮郡夷人鑿木為槽以渡此水牛欄江在治東南三舍源出尋

甸軍民府下流合金沙江江濶水急夷人用藤索橫江貫以木筩過者縛身筩上遊索以濟 土夷攷云嘉靖中土官祿信長子天恩死天恩妻阿福自掌府事季子天寵以弟當繼襲有妻設易與目把私通弑天寵而與阿福爭印妯娌自相攻殺頗稱多事焉蓋府雖隸于蜀川而城郭衙舍設在滇黔之中道路嶮巇兵馬素強以是為鴛鴦云

烏撒軍民府

舊名巴凡兀姑後名的巴甸唐時烏蠻之裔孫曰烏爰

者居此至阿蒙始得巴的甸其東西又有芒部阿晟二
部皆他酋所據宋時烏夢之後曰折怒者始并其地號
烏撒部元至元中始內附置烏撒路招討司尋改為軍
民總管府又改軍民宣撫司後改烏撒烏蒙等處宣慰
司元末四川分省右丞那者以其地來歸於是烏撒軍
民府以那者知府事隸雲南布政司十六年改隸四川
設官與烏蒙東川同今土官安氏其裔也 經畧志云
烏撒府編戶二里耳而富盛甲於諸夷積累日深有可

慮者其產有刺竹及猿山崖險阨襟帶二湖羊腸小徑
十倍蜀道也 圖經云烏撒之地東西廣四百四十里

南北袤三百五里東至播州宣慰司界二百五十里西
至烏蒙府界百九十里南至雲南霑益州界九十五里
北至芒部府界二百一十里至成都千二百五十里

志云七星關在府東南百七十里元馮福可詩點蒼何
蒼蒼環如西洱河百年雨露恩詎敢煩天戈轅門振烏
撒衣帶踰牂牁巨險久已夷故關尚坡陀云胡七星名

亦復垂不磨 又云東門之外石駝關有石如索駝立
關下又云有老鴉關善欲關俱在府東三百里貴州畢
節衛人戍之 志又云東南三里有大隱山東北百四
十里有烏門山兩崖相對如門然東二百里翠屏山
元何弘佐翠屏山詩云俗山如俗人過眼不相揖踞鞍
無好詩羈愁拍胸臆行行見翠屏景意兩相適烟蘿暮
青黛崖嶂剝蒼壁雲霞油然生杉檜森以立鳴禽遞清
響飛泉散珠吸我疑有幽人巖居喜深密朝飡紫霞英

暮鳴香松實 又云東南百七十里石洞洞容百餘人窮處又得石竇遊者以炬不知遠近而出 盤江在治西百五十里流入叙州養馬川在治東百四十里夷人牧馬之處一名豎馬川治西一舍有七渡河南三舍有可渡河西南百十里有九十九渡水

鎮雄軍民府

通志云古為屈流大雄甸昔烏蠻之裔阿統與其子芒布居此地其後昌盛因祖名號芒布部宋置西南番部

都大巡檢司元至元中置芒布路隸烏撒烏蒙宣慰司
入本朝改為芒部府初隸雲南洪武中陞為芒部軍民
府隸四川布政司屬川南道 弘治間土官隴慰先娶
水西女冲中生子曰慶與壽繼娶烏撒女冲叔生姦子
隴政既而讐殺水西則為隴壽之助烏撒則為隴政之
黨嘉靖三年慰死嫡子壽繼職庶子政謀壽殺之都御
史王軌奏調官兵擒政及其嫂支祿繫獄死奏改流鎮
雄府設經歷照磨教授各一人立懷德長官司於却佐

威信長官司於毋響歸化長官司於夷良安靜長官司於落角以重慶府通判程洸為試知府明年洸方募民占種夷田於是水西乘機勾引隴壽之党沙保為亂沙保者故水西媵奴也與壽部下阿得獅子吼等破府城逐洸劫其印川貴會奏動三省官兵勦之沙保詐稱已死主者弗察誤以捷聞各陞賞有差七年沙保等復聚寇掠奏聞會議土官土舍或爭襲或讐殺興師問罪甫定之後建議者即欲改設流官及流官再設而土夷隨

叛殺人奪地比昔尤甚蓋作惡者不過一二人今乃以
一二人之惡而遂致改易一府一州拂其本心違其約
信所謂犯衆怒也是以屢勦屢亂而兵革卒無寧日合
無凡有土官惡逆被顯戮者通拘所部頭目令其自保
應立力足以制服夷衆之人或土官之子孫弟姪族人
俱為衆所推服者於是議以隴勝為知府為聘永寧宣
撫奢爵女奢氏為妻更名隴安授女官知府安擒獻沙
保地方頗寧安死子隴清襲清生子來鳳早卒次子來

龍尚幼生母奢氏更名隴高護印撫子而隴清妻者氏與之爭自把各私所好仇殺二年委官勘處令二婦同掌兵戈始息及後者氏耄而來龍妻祿氏再贅水西安堯臣盤據其地印為携去隴不絕如綫萬厯戊申年以永寧之役堯臣發兵助惡始驅之去而蜀中欲立阿克默中欲立普德相持良久者氏恐一旦填溝壑乃兩廢之差官會勘以夷漢目把所共願立者為主于是始易阿破為土知府而堯臣不敢復垂涎矣 圖經云芒布

部廣袤二百七十里東南俱抵烏撒不及三十年以阿
赫關為界西至烏蒙界二百四十里北至珙縣二百二
十里以樂安山為界至成都可千里司北百八十里勿
食料溪源出樂安山也司南二十里外苴斗河源出六
丈箐經七星關其山川險阨地勢崎嶇左峙綽忸右繞
砢礪其風俗勁而愚朴而野男業耕稼婦絕粉黛崇信
巫鬼其土產有石瓜樹生祓堅如石能已心痛志云芒
部司西南有鼠街其俗夷人每遇子日則交易於此

又云夷語以首為鳥以立為通司北五里鳥通山如人翹首而立故名以清氣為綽忸司東二十綽忸山有爽氣也以松為託以沙石為諾司西南二百里外託諾河岸側多松栢沙石故名又有砢砢雄山見通釋

永寧宣撫司

通志云晉置永寧縣屬雲南郡宋及周隋因之唐改置蘭州屬益州宋初州廢為江安合江二縣之境後設永寧路遷至馬口崖漁漕溪側元因之領筠連州騰川縣

隸四川行省尋改軍民宣撫司明玉珍改設永寧鎮邊
都元帥府仍設宣撫司國朝洪武中宣撫使祿照歸附
改為永寧長官司割筠連屬叙州後仍陞宣撫司屬川
南道司治舊在馬口崖即宋乾德所改也開熙間遷於
界首國初土官祿照因蠻夷千戶所舊址遷焉環城皆
山疊翠如屏紅崖鎮北漁溪橫南亦山水之滙也 唐
書天寶載伐南詔由西路進起瀘州泝永寧走赤水達
曲靖古味縣也設郵傳自元始志云普市驛在司東五

十里摩尼驛在南九十里為赤水驛又四十里為阿永驛
赤水有衛普市摩尼有千戶所皆屬黔土夷攷云衛西
至納谿縣南至鎮雄府各四百里北至合江縣百六十
里東至播州界二百五十里職官宣撫仍舊加設土官
同知一人流官經歷教授稅課局遞運所大使各一人
并九姓太平二長官司編戶七里其風俗刻木為信巢
居箐寨不事商賈惟務農業垂髻跣足懸帶弓弩巴蜀
耆舊志云永寧即古寧州極西南有閩濮鳩獠獠越牂

身毒之民土地沃腴黃金光珠琥珀翡翠孔雀犀象蠶
桑綿絹綵帛文繡又有貊獸食鐵猩猩能言其血可以
染朱罽有大竹名濮竹節相去一丈受一斛許 志云
赤水河源出芒部水腦澗流經司東南遶赤水衛衛東
二十里有雪山窮冬積雪夏至方消 沽溪在司南半
舍源出蠻界流入漁漕溪溪在九姓司東馬口崖下
司北有海漫山延袤八十餘里起伏不絕如海之汗漫
故名西北兩舍有高瀑自山頂飛來如足練也西南一

山圓瑩如珠曰西珠山有仙婆墓在西山烏降山下銅鼓溪崖相傳有女子名滿者有道行及笄不字能前知吉凶卒葬于此 九姓長官司唐宋以前俱蠻地元立夷民羅黨九人為總把至元初稱為九姓羅氏黨蠻夷長官千戶國初改九姓長官司編戶五里 初宣撫奢效忠名其妻曰世統妾曰世續而無子取親枝崇禮者撫之萬歷十九年世續鵠崇禮據印自官又養水西安彊臣妻弟阿利為子世統爭之兵連禍結且二十餘年後

以崇禮之弟崇明嗣其官追印畀之而印實為安堯臣
携之鎮雄矣三十五年都司僉書張神武質世續于庭
而印不可得遂拘繫之惡目闔宗傳等請兵水西來襲
永寧城中有備不得志而移禍于摩尼普市二所焚劫
殆盡摩普乃屬黔省怨蜀甚而大中丞喬公惡堯臣之
黨惡也動大兵以驅之詳見鎮雄下蘭局亦從此結矣

蜀中廣記卷三十六

欽定四庫全書

蜀中廣記卷三十七

明 曹學佺 撰

邊防記第七

上川東

遵義道開府夜郎與總戎同城而居近以建南有事大將軍移鎮以游擊一員代其他材官將領各有差歲抽通省民兵五千名歛其食餉而已說者謂蕩平既久當

以播供播勿煩內地為也然盈庭不決則任事之難耳
漢書南夷君長以十數夜郎最大在蜀郡徼外其國臨
牂牁江江廣數里出番禺城下按戰國時楚頃襄王將
莊蹻從沅水伐夜郎君至且蘭柅船于岸而步戰既滅
夜郎國因留王滇池以且蘭有柅船牂牁處乃改其名
為牂牁牂牁繫船筏也武帝時使唐蒙通夜郎國於是以
夜郎旁小邑立犍為郡戍轉相餽數歲士罷餓離暑濕
死者甚衆西南夷又數反發兵興擊耗費無功帝患之

使公孫弘往視問焉還言其不便乃且罷獨置南夷兩
縣一都尉元狩元年張騫言使大夏時見蜀布邛竹杖
問所從來曰從東南身毒國可數千里得蜀賈人市或
聞邛西可二千里有身毒國于是乃令王然于柏始昌
等間出西南夷往身毒國至滇道皆為昆明所閉莫能
通身毒及南越反上使發南夷兵且蘭君小邑乃與其
衆反漢發巴蜀校尉擊破之遂平南夷為牂牁郡夜郎
侯始倚南越南越滅恐懼遂入朝封為夜郎王昭帝始

元元年牂牁談子同並等二十四邑凡三萬餘人皆反遣水衡都尉發蜀郡犍為兵擊牂牁大破之後始繒葉榆人復反鉤町侯亡波率其人擊之有功漢立亡波為鉤町王至成帝和平中夜郎王興鉤町王禹漏卧侯俞更舉兵相攻牂牁太守請發兵誅興等漢以道遠不可擊遣太中大夫張匡持節和解並不從杜欽說王鳳曰匡使和解蠻夷王侯不從不憚國威其效可見恐議者選愼復守和解太守察動靜有變迺以聞如此則復曠

一時王侯得收獵其衆申固其謀黨助衆多各不勝忿必相殄滅自知罪成狂犯守尉遠藏濕暑毒草之地雖有孫吳將賁育士若入水火往必焦沒智勇亡所設施屯田守之費不可勝量宜因其罪惡未成不疑國家加誅陰勅旁郡守尉練士馬大司農先調穀積要害處選任職太守以秋涼時入誅其王侯尤不軌者即以為不毛之地亡用之人信不勞中國宜罷郡放棄其人絕其王侯勿復通如以先帝所立累世之功不可墮壞亦因

宜其萌芽早斷絕之及已成形然後興師則萬姓被害
矣鳳于是薦陳立為牂牁太守至牂牁乃從吏數十人
出行縣召興與將數千人往立數責因斷興頭出曉其
衆皆釋兵降興子邪務收餘兵迫脇旁二十二邑反立
又擊平之 華陽國志元鼎二年開牂牁郡屬縣十七
戶六萬及晉屬縣四戶五千而已公孫述時三蜀大姓
龍傳尹董氏與牂牁功曹謝遑保郡聞世祖在河北使
使由番禺江出朝貢世祖嘉之號為義郎按遵義之名

始此方輿云遵義軍俗以射獵伐山為業信巫鬼重誑
祝好詛盟外癡內黠安土重舊凡交易刻木為書契結
繩以為數其桀黠能言議屈服種人者謂之耆老其婚
媾以銅器羶刀弩矢為禮其燕樂以銅鑼鼓橫笛歌舞
為樂其所居無城池之固架木為閣聯竹為壁開窓出
箭以備不虞出入佩刀弩自衛至與華人交易畧無侵
犯有禮義之風凡賓客聚會酋長以漢為貴其民端麗
淳固以耕殖為業天資忠順悉慕華風矣 寰宇記云

西南諸夷漢牂牁郡地唐置費珍莊琰播郎牂夷等州
按播州之名始此其地北距兗州百五十里東距辰州
二千四百里南距交州千五百里西距昆明九百里無
城郭散居村落土熟多霖雨稻粟皆再熟無徭役隋大
業末首領謝龍羽據其地勝兵數萬人四夷述云牂牁
蠻姓謝氏舊臣中國世為本土牧守隋末大亂遂絕唐
武德二年其首領謝龍羽遣使朝賀授牂州刺史封夜
郎公勝兵戰士數萬于是列其地為牂州屬黔中羈縻

後為正郡 寰宇記云牂州轄三縣曰建安即州理曰賓化曰新興其地與播州同唐書武德二年立充州因是置播牂等郡梁氏十道志云開元初猶有此郡後之郡國記錄乃無此名寰宇又云充州牂柯都尉居之縣有梓潼底水思王思渝歷代史云充州在牂州北百十里開元二十五年其酋趙君道來朝王建僭偽不通中國首領五姓龍方張石羅而龍氏最大後唐天成二年牂柯清州刺史宋朝化等來朝其後孟知祥據西川復

不通乾德三年平孟昶五年知西南夷南寧州蕃落使
龍彥瑤等遂來貢詔授瑤歸德將軍南寧州刺史蕃落
使開寶四年瑤卒子漢瑋嗣詔襲父職太平興國五年
夷王龍瓊瑤遣子并諸州蠻七百四十四人以方物名
馬來貢雍熙二年夷王龍漢濬自稱權南寧州事兼蕃
落使遣牂牁諸州酋長來獻方物名馬并上蜀孟氏所
給符印授漢濬歸德將軍南寧州刺史其後夷王龍漢
興龍漢濬相繼遣使貢方物授濬寧遠大將軍封歸化王

景德四年西南蠻羅甕井都指揮使顏士龍等來貢士龍種落遐阻未嘗來朝今始至詔館餼賜予如高溪播州志云唐末南詔陷播州太原人楊端應募復之遂有其地四傳至楊貽無子維時宋益州刺史楊延昭之子充使廣西與貽通譜以其子貴遷後之從狄青南征楊文廣即延昭之孫也在播州者傳至絜而益大鑑乃其裔云四夸述云東謝蠻渠帥姓謝氏南蠻別種在黔州之西數百里地方千里有酋長即謝元深也其一族不能女自云高姓不可下嫁唐

貞觀三年元深入朝冠烏熊皮冠若今之旄頭以金絡額披毛帔韋皮行滕而著履時中書侍郎顏師古奏言昔周武王天下太平遠國歸款太史乃集其事為王會篇今萬國來朝至如此輩章服實可圖寫今請撰王會圖詔從之開其地為應州隸黔州都督府南謝首領謝疆與西謝蠻隣接與元深俱來朝拜為南壽州刺史後改為莊州是也其地宜五穀無文字刻木為契散則山谷倚樹為巢居無賦稅之事皆自為生業刀劍不離其身男女椎髻以緋

束之後垂向下冠熊皮披猛獸革南接守宮獠西連夷
子北至白蠻按南壽州即分牂牁所者或云楚威王時
有莊蹻將甲士二萬人入牂牁故取莊為州名開元十
道記有此郡額後之志錄并廢元領縣八皆貞觀以來
相次建置永徽以後併省其名曰石牛南陽輕水多樂
樂安石城新安賓化 四夷述又云西趙蠻在東謝之
南并南蠻別種其界山洞深阻莫知里數南北十八日
行東西二十三日行趙氏代為酋長有萬餘戶自古不

臣中國唐貞觀三年遣使入朝至二十一年于此置明
州其地東至夷子西至昆明南至西洱河土俗與東謝
同唐史貞元十三年西南蕃大首領正議大夫檢校蠻
州長史繼襲蠻州刺史資陽郡開國公宋鼎左右大首
領朝散大夫前檢校邛州刺史謝汕右大首領繼襲攝
蠻州巴江縣令宋萬傳界首子弟大首領朝散大夫牂
牁錄事叅軍謝文經黔中經界招討觀察使王礎奏前
件刺史建中三年一度來朝賀貢方物自後不令隨例

入朝今年懇訴稱與牂柯同被聲教獨此排擯自慚恥
謹隨牂柯等朝賀伏乞特賜優諭兼同牂柯刺史等授
官其牂柯蠻兩州戶口殷盛人力强大鄰側諸番悉皆
敬憚請比二州每三年一度朝賀仍依牂柯例輪還差
定以才幹位望為衆所推者充之勅旨宋鼎已改官訖
餘並依奏 寰宇記曰唐時黔州都督府管播州下五
十三州曰南寧州本清溪鎮唐末置在黔州西南二十九
日行從南寧州至羅殿王部落八日行與雲南接界曰

兗州曰琰州曰捷州曰莊州曰明州曰祥州曰矩州曰
清州凡九州每年朝貢曰犴州襲州莪州蠻州邦州鶴
州勞州羲州福州鼓州儒州鸞州令州郝州普寧州總
州鄒州勲州功州敦州侯州晃州茂龍州整州懸州樂
善州契州添州延州雙城州訓州卿州撫水州思源州
逸州殷州南平州盧州姜州梭州鴻州和武州暉州亮
州凡四十四州洞內羈縻而已 土夸考云東至偏橋
衛南至養龍坑楚黔二省界西至瀘州合江縣北至重

慶府綦江縣俱川省界此今之播州也明興楊鑑率衆
歸附以其地為播州宣慰司授鑑宣慰使領播州餘慶
白泥容山真州重安六長官司草塘黃平甕水三安撫
司自鑑至相十世矣嘉靖十七年楊相父子爭職議勘
相不敢入播客死水西萬厯元年楊應龍襲職即相之
子也世有逆德應龍淫殺無忌初黃平草塘白泥餘慶
重安五司凡承襲表箋須宣慰司印文乃達往往索賄
無厭此釁端所由起又其地有七姓之民應龍寄以腹

心七姓又藉龍為奇貨糜費金錢累巨萬久之龍覺其欺乃稍稍收其權遂交讐怨七姓叩閭鳴冤且反噬龍矣應龍娶妻張氏失寵其族弟瑞龍聘田氏應龍強委禽焉萬歷十五年田氏生子方彌月與應龍在室共語族弟繼龍偶入戶遁去應龍見而立斬之田氏曰妾非張何例視我應龍怒曰我不殺此奴今效尤耶乃立殺張首併劓張之母等張闔族奏應龍殺妻併妻母兄弟等命下川貴勘處應龍初亦抗拒不出已聞議撫乃俛

首出聽勘龍革任罰贖金四萬免死會朝鮮告急應
龍計以征倭贖前愆朝廷可其奏遂得解網然疑畏日
甚進退維谷二十三年應龍子以贖金未完死渝州獄
中應龍率蠻兵駢僧千餘至發喪二十六年托獻大木
所過無不殘滅朝議應龍雖經勘問皆務姑息非鎮攝
蠻夷之策於是天子赫然震怒命將興師大集三省之
兵猛將謀臣星聚雲合而又特遣總制侍郎邢玠往臨
之貴州支可大撫湖廣江鐸撫偏橋李化龍總督川貴

湖廣之師會軍重慶府二十七年正月進兵六月初六日破海龍囤二十一日俘入重慶死于遼事平剖播為二四川遵義府屬三縣一州貴州平越府屬四縣一州改流設官詳平播全書中 土夷攷又云播州長官司治附郭長官王姓其地左抵永安驛右抵海龍囤間雜楊氏腹裏播事江長官王積祿甘為應龍死黨亦其勢不得不爾今多屬遵義縣夷漢民各半 餘慶長官司在司南百六十里元至正間毛毚從宣慰楊加禎征蠻

有功授校尉本部長官後改為餘慶州俾毛氏世為土
知州本朝仍為長官司其地接連播州七牌苗巢左抵
湄潭右抵雍水上達烏江下至岑黃於播最近楊氏不
靖毛匪寧宇馬蕩平後改餘慶縣屬貴州平越府 白
泥長官司在司東南三百里宋景定中楊萬從征入播
蠻有功授白泥長官元改為白泥州本朝復改長官司
其地上抵草塘下抵偏橋鎮遠帶其左黃平列其右土
田濶饒士馬强健實甲諸司與楊氏不睦七姓之一也

容山長官司在司東三百二十里長官張姓其地界湖貴間於八司中獨為外服溪山荒曠土田鹵瘠中國商販不到其人以獵射為生以刼殺為業自嘉靖間為臻洞苗所殘破數十年來民夷鴛鴦土田荒蕪長官不能治也舊有湄潭驛蕩平後改湄潭縣屬貴州平越府真州長官司今改真安州詳見名勝重安長官司在司東南四百里宋元黃平府地國初頭目張佛保招撫苗蠻有功授正長官馮鐸從宣撫楊鑑征麻哈有功

授副長官多生苗去播最遠原屬黃平故知有黃平不
知有播圖經其地東至宣化司界北至楊義司界各二
十里南至凱里司界十里西至清平縣界五里 草塘
安撫司在司東二百二十里介甕水黃平之間其地環
江土饒裕頗有華風宋咸淳間有雲南貴者商賈入滇
因邊警投楊宣慰邦憲為頭目元世祖時雲貴孫邦佐
有戰功授都勻軍民府知府始有草塘地國初宋顯威
從楊鑑歸附改授安撫其地東至黃平司椒溪暖水界

西至高平甕水二司界南至平越衛界北至播州楊梅浪于界 黃平安撫司在司東南三百里舊為黃平府實楊鎮子孫世守之元世祖時黃平蠻叛楊宣慰漢英討平其將羅季明功多遂以土授羅氏改隸播州洪武初羅鏞從楊鑑歸附授黃平安撫其地廣饒險固有城垣足據扼雲貴之門戶為諸司之襟帶蓋西南一要境舊設通判一員總轄諸司又設千戶所駐劄司城聽通判調用城中夷漢雜處昔楊酋不道首與為難者也其

地東至湖廣偏橋衛五十里西至貴州平越衛南至清
平衛各三十里北至白泥司界百五十里蕩平改黃平
州 甕水安撫司在司東一百二十里宋紹興間開設
長官猶姓景定中進士猶道明播人蓋其族也洪武初
猶恭歸附授安撫密邇于播亦與楊酋交惡其地東至
播四牌界二十里西至黃灘關十五里南至水西界二
十里北至麻子水界二十里蕩平改甕安縣屬平越府

蜀中廣記卷三十七

欽定四庫全書

蜀中廣記卷三十八

明 曹學佺 撰

邊防記第八

上川東

南平 平茶 邑梅 酉陽

史記高帝為漢王發夷人還伐三秦秦地既定乃遣還巴中復其渠帥羅朴咎鄂度夕龔七姓不輸租稅餘戶

乃歲入錢口四十宋史渝州蠻者古板楮七姓蠻唐之南平獠也其地西南接烏蠻昆明哥蠻大小播州部族數十居之治平中熟夷李光吉梁秀等三族據其地各有衆數千家間以威勢脅誘漢戶有不從者屠之没入土田往往投充客戶謂之納身稅賦皆里胥代償藏匿亡命數以其徒偽為生獠劫掠邊民官軍追捕輒遁去習以為常密賂黠民覘守令動靜稍築城堡繕器甲遠近患之熙寧三年轉運使孫固判官張詵使兵馬使馮

儀并簡杜安行圖之以禍福因進兵復賓化砦平蕩三族以其地賦民凡得租三萬五千石絲綿一萬六千兩以賓化砦為隆化縣隸涪州建榮懿扶歡兩砦其外銅佛壩者隸渝州南川縣地皆膏腴自光吉等平他部族據有之朝廷因補其土人王才進克巡檢委之控扼才進死部族無所統數出盜邊朝廷命熊本討平之建為南平軍以渝州南川涪州隆化隸焉 渝州志云黔涪徼外有西南夷部漢牂牁郡唐南寧州牂牁昆明東謝

南謝西趙兖州諸蠻相為聯屬宋初以來有龍蕃方蕃
張蕃石蕃羅蕃者號五姓蕃皆常奉職貢受爵命治平
四年十二月知靜蠻軍蕃落使守天聖大王龍異閣等
入見詔以異閣為武寧將軍其屬二百四十一人各授
將軍及郎將熙寧元年有方異玘三年有張漢興各以
方物來獻授異玘靜蠻軍漢興捍蠻軍並節度使六年
龍蕃羅蕃方蕃石蕃八百九十人入覲貢丹砂羶馬賜
袍帶錢帛有差其後比歲繼來龍蕃衆至四百人往返

萬里神宗憫其勤詔五姓蕃五歲聽一貢人有定數無輒增及別立首領以息公私之擾命宋敏求編次諸國貢奉錄客省四方館撰儀皆著為式元豐中張蕃乞添貢奉人至三百詔不許故事以七十人為額不許七年西南程蕃乞貢方物願依五姓蕃例注籍從之元祐二年西南石蕃石以定等齋表自稱西平州武聖軍禮部言元豐著令以五年一貢為限今年限未及詔特令入貢五年八年紹聖四年龍蕃皆貢方物龍氏於諸姓為最

大其貢奉尤頻數使者但衣布袍至假伶人之衣入見
蓋實貧陋所冀者恩賞而已元符二年又有年為蕃入
貢詔以進奉人韋公憂憂市公利等為郎將諸蕃部族
數十獨五姓最著程氏韋氏比附五姓號西南七蕃云

酉陽宣撫司

隋圖經集語云黔中是武陵郡酉陽也按漢酉陽在今
溪州大鄉界與黔州約相去千餘里今之三亭縣西百
九十餘里別有酉陽城乃劉蜀所置非漢之酉陽也貞

觀地志言劉蜀所置酉陽為漢酉陽蓋誤認漢涪陵之地也 寰宇記云酉陽古蠻夷地春秋屬楚地秦昭王取之隸黔中郡漢以酉陽縣地置武陵郡尋置牂牁郡吳分置黔陽郡隋以縣屬巴東郡唐武德初徙縣治務川四年招慰司冉安昌以務川當牂牁要路須置郡以撫之復於縣理置務川領務川涪川扶陽三縣至貞觀元年以廢夷州之伏遠寧夷思義高富明陽丹川六縣廢思州之丹陽城樂感化恩王多田五縣來屬其年省

思義明陽丹川五縣二年又省丹陽一縣四年改務州
為思州以界內思邛水為名其年以涪川扶陽二縣八
年又以多田城陽二縣俱割入費州又廢感化縣十年
又以高富縣割入黔州十一年又省伏遠縣但領務川
思王寧夷三縣開元四年又以州東立思邛縣二十五
年割寧夷縣夷州天寶元年改為寧夷郡乾元元年復
為思州黃巢之亂酉陽蠻叛駙馬冉人才征之有功留
守其地五代時中國無主冉氏遂據之按志宋正和六

年復于務川縣置思州領縣三酉陽隸焉復陞為州知
州冉守忠善於撫字酉人懷之元李冉氏世知本州明
王珍僭據以酉陽州為沿邊溪洞軍民宣慰司國朝洪
武初冉如彪納土歸附仍為酉陽州後陞為酉陽宣撫
司令冉氏子孫世襲領石耶洞長官司永樂中改隸重
慶府建立學校俾漸華習三年入覲十年大造略比諸
郡縣志云司西北百八十里酉陽山入黔江縣界郡
國志云小酉山入龍標界即王昌齡謫處也水經注云

酉水北岸有黟陽縣許慎曰溫水南入黟蓋鼈水以下
津流注之通稱故縣受名焉西鄉溪口在遷陵縣故城
上五十里左合酉水酉水又東際其故城北又東逕酉
陽故縣南而東出也兩縣相去水道可四百許里於酉
陽合志云司東南九十里三江山江源出酉陽與小溪
會合平茶水東注辰州大江其地廣袤七百里東至
保靖宣撫司界西至彭水縣界南至平茶長官司及思
南沿河界各三百里北至大田軍民千戶所界四百里

當思南之要衝接荆湘之邊境山磳阻深易為憑藉古
號難治人分三種曰玃獠曰冉家曰南客暖則捕獵山
林寒則散處巖穴借貸以刻木為契婚姻則累世為親
編戶十三里其屬有九溪十八洞蠻惟是九江後溪西
南一帶近為鎮筰苗殘破境土日削莫克恢復常告急
于我焉 石耶長官司酉陽屬地也先朝自宋楊昌安
者竊據其地昌安太原楊業之裔宣和間征伐有功蠻
人畏服因世為石耶土知府洪武初楊金隆歸附改立

長官司設長官二員皆楊氏世職別設流官吏目一員
主其租稅附庸酉陽覲貢不親至京師人織斑布以為
衣佩長刀而捕獵編戶二里鎮蠻洞而帶五溪連黔彭
而接荆楚東至石凱子界西至平茶司界南至邑梅沙
子四北至酉陽石開回與鎮筸苗密邇地勢孤懸不減
于二酉也 志云石耶人呼石版為巴壩治南一里巴
壩山言此山多版石也又二里有石崖土人呼為密那
崖崖下有洞世傳有道人修行其中每以餅餌獻遊者

在洞中猶見熟麵持出洞外則石矣

平茶長官司

秦屬黔中郡三國屬吳為黔陽縣地隋屬巴東郡唐武德初屬思州天寶間屬寧夷郡五代陷于番宋政和間始得其地置平茶洞元初改溶江芝子平茶等處長官司隸思州安撫司以其地授楊大雷為土知府洪武間楊抵剛歸附改授長官司隸酉陽宣撫後改隸渝州覲貢賦稅大畧與酉陽同編戶三里所屬有五種夷言語

侏離性好捕獵火炕焙穀野麻緝布巫禱治病歌唱送殯號為南客 其地廣袤一百二十里東至石耶長官司界一十里西至貴州烏羅長官司界一十里南至銅仁府界一百里北至酉陽宣撫司界五十里以二酉為藩籬石耶為襟帶也 志云治南諸葛洞相傳武侯征九溪蠻信宿洞中石床存焉又云侯於洞中以一握粟秣馬化為石粟至今神之西三十里白歲山高聳挿天土人言此山白則有年積雪為白也山之水一流入東

南名哨溪以溪聲如鳴哨一流入西南為滿溪以其水
常溢不流治北有高秀山丹崖翠壁如畫圖土夷攷所
謂地多秀山聳插翠雲者矣其人驍悍善戰萬厯初年
馬湖之役長官楊光祖之功為多

邑梅長官司

宋末太原楊光甫據其地元改為拂鄉洞以楊氏為土
知府明玉珍僭據改為邑梅沿邊洞軍民府洪武初楊
金奉歸附立為長官司編戶五里初隸酉陽永樂初改

隸渝州 其地廣九十里袤三百三十里東至湖鎮溪
千戶所界七十里西至貴州烏羅長官司界二十里南
至平頭著可長官司界一百里北至酉陽宣撫司界一
百三十里其人語異蠻音衣穿斑布用木浪槽為臼而
舂稻梁漚苦蒿水代鹽而鮓宿肉婚姻以牛隻為等疾
病以巫祝為醫競私鬪昧公義雖有勇敢徒以偕亂然
不能禁箠苗之蠶食也 志云司西南六里壽山林木
叢茂屹立層漢蒼烟翠靄四時不凋東三里黃牛山相

傳土官楊四舟高殿始自烏羅過此見土地膏腴宜耕
稼因喜推黃牛以享衆故名司南八里有韭山昔人遺
韭于山顛因蕃衍生韭長丈餘四時皆有土民采食之
西北二十里凱歌河行者至此必謳而渡俗呼凱過河
河干有凱子寨焉

蜀中廣記卷三十八